

## POZIV NA MIROTVORNI USTANAK

Nezavisne ženske grupe i organizacije, organizacije prijatelja djece, mirovni pokreti, demokratske van parlamentarne i nevladine organizacije i odbori i pokreti roditelja za zaštitu vojnika iz svih krajeva Jugoslavije okupili su se u Sarajevu da bi zaustavili rat.

Sa sviješću da je solidarnost jedino pravo sredstvo ugroženih, ovo ujedinjenje mirovnih inicijativa daje novi kvalitet i podsticaj angažiranju za mir.

Zalažemo se za mir, ljubav, suživot i ljudska prava, za prava naroda i narodnosti i prije svega za opstanak ljudi u svim djelovima zemlje. Razlike među nama u razmišljanjima kako preurediti ovu zemlju, ne smanju je našu zajedničku volju da živimo u miru i našu odlučnost da se to preuređenje dogovori i provede mirno i bez upotrebe sile.

Naš poziv je upućen građankama i građanima da ne dozvole danas i dalje guraju u mržnju i da svim demokratskim sredstvima prisile političare na odgovornost i poštivanje želje ogromne većine ljudi da žive u mirnoj, demokratskoj zajednici.

Jugoslavija je na prekretnici kako <sup>da</sup> još može izabrati pravi mir ili do kraja potonuti u krvavi rat.

Sada je posljednji trenutak za depolitizaciju armije i demilitarizaciju politike. Osuđujemo razaranja, paljevine i uništavanje mirnih sela i gradova, ubijanje, pljačke i istjerivanje ljudi sa svojih vjekovnih ognjšta i stvaranje etnički čistih prostora kao zločin protiv čovječnosti. Zahtjevamo momentalni prekid svih oružanih akcija, kako jedinica JNA tako i svih drugih oružanih formacija u Jugoslaviji. Zahtjevamo poštivanje svih zakonom zagwarantiranih prava vojnika i organizirat ćemo kontrolu putem roditelja i mirovnih organizacija nad ostvarivanjem tih prava. Podržavamo mirotvorne snage u armiji.

Zahtjevamo da se odmah obustave mobilizacije rezervista.

Zahtjevamo momentalno zaustavljanje daljeg naoružavanja. Protivimo se vojnoj ekonomiji: treba nam kruha a ne tenkova.

Tražimo od međunarodne zajednice da zabrani i onemogući uvoz novog oružja u Jugoslaviju.

Pozivamo međunarodnu zajednicu da se uključi u proces razrješavanja svih konfliktnih situacija, a ne samo onih koje su se već zaoštrile i pretvorile u teška krizna žarišta.